

摛藻堂四庫全書薈要

集部

欽定四庫全書叢要

集部

漢魏六朝百三家集卷十一

詳校官候選知縣臣吳甸華



欽定四庫全書薈要卷一萬九千六百集部

漢魏六朝百三家集卷十一

明
張溥
輯

卷之三

國賦圖

兩都賦 有序

或曰賦者古詩之流也昔成康沒而頌聲寢王澤竭而詩不作大漢初定日不暇給至於武宣之世乃崇禮官

考文章內設金馬石渠之署外興樂府協律之事以興廢繼絕潤色鴻業是以衆庶說豫福應尤盛白麟赤雁芝房寶鼎之歌薦於郊廟神雀五鳳甘露黃龍之瑞以為年紀故言語侍從之臣若司馬相如虞丘壽王東方朔枚舉王褒劉向之屬朝夕論思日月獻納而公卿大臣御史大夫倪寬太常孔臧太中大夫董仲舒宗正劉德太子太傅蕭望之等時時間作或以抒下情而通諷諭或以宣上德而盡忠孝雍容揄揚著於後嗣抑亦雅

頌之亞也故孝成之世論而錄之蓋奏御者千有餘篇
而後大漢之文章炳焉與三代同風且夫道有夷隆學
有龐密因時而建德者不以遠近易則故臯陶歌虞奚
斯頌魯同見采於孔氏列於詩書其義一也稽之上古
則如彼考之漢室又如此斯事雖細然先臣之舊式國
家之遺美不可闕也臣竊見海內清平朝廷無事京師
修宮室浚城隍而起苑囿以備制度西土耆老感懷怨
思冀上之睠顧而盛稱長安舊制有陋洛邑之議故臣

作兩都賦以極衆人之所眩曜折以今之法度辭曰

西都賦

有西都賓問於東都主人曰蓋聞皇漢之初經營也嘗有意乎都河洛矣輒而弗康寶用西遷作我上都主人聞其故而覩其制乎主人曰未也願賓攄懷舊之蓄念發思古之幽情博我以皇道弘我以漢京賓曰唯唯漢之西都在於雍州實曰長安左據函谷二崤之阻表以太華終南之山右界褒斜隴首之險帶以洪河涇渭之

川衆流之隈汎湧其西華實之毛則九州之上腴焉防
禦之阻則天地之隩區焉是故橫被六合三成帝畿周
以龍興秦以虎視及至大漢受命而都之也仰悟東井
之精俯協河圖之靈奉春建策留侯演成天人合應以
發皇明乃眷西顧寔惟作京於是睇秦嶺賊北阜挾澧
瀾據龍首圖皇基於億載度宏規而大起肇自高而終
平世增篋以崇麗歷十二之延祚故窮奢而極侈建金
城之萬雉呀周池而成淵披三條之廣路立十二之通

門內則街衢洞達閭閻且十九市開場貨別隧分人不得顧車不得旋闌城溢郭旁流百塵紅塵四合煙雲相連於是既庶且富娛樂無疆都人士女殊異乎五方遊士擬於公侯列肆侈於姬姜鄉曲豪舉遊俠之雄節慕原嘗名亞春陵連交合衆騁騖乎其中若乃觀其四郊浮遊近縣則南望杜霸北眺五陵名都對郭邑居相承英俊之域綏冕所興冠蓋如雲七相五公與乎州郡之豪傑五都之貨殖三選七遷克奉陵邑蓋以強幹弱枝

隆上都而觀萬國封畿之內厥土千里卓犖諸夏兼其所有其陽則崇山隱天幽林窮谷陸海珍藏藍田美玉商洛緣其隈鄆杜濱其足源泉灌注陂池交屬竹林果園芳草甘木郊野之富號為近蜀其陰則冠以九嶠陪以甘泉乃有靈宮起乎其中秦漢之所極觀淵雲之所頌歎於是乎存焉下有鄭白之沃衣食之源提封五萬疆場綺紛溝塍刻鏤原隰龍鱗決渠降雨荷鍤成雲五穀垂穎桑麻鋪棻東郊則有通溝大漕潰渭洞河泛舟

山東控引淮湖與海通波西郊則有上園禁苑林麓藪澤陂池連乎蜀漢繚以周牆四百餘里離宮別館三十六所神池靈沼往往而在其中乃有九真之麟大宛之馬黃支之犀條枝之鳥踰峴嶧越巨海殊方異類至于三萬里其宮室也體象乎天地經緯乎陰陽據坤靈之正位放太紫之圓方樹中天之華闕豐冠山之朱堂因瓊材而究奇抗應龍之虹梁列棼橑以布翼荷棟桴而高驤雕玉瑱以居楹裁金璧以飾璫發五色之渥彩光

爛朗以景彰於是左城右平重軒三階閨房周通門闈
洞開列鐘虞於中庭立金人於端闈仍增崖而衡閨臨
峻路而啓扉徇以離宮別寢承以崇臺閒館煥若列宿
紫宮是環清涼宣溫神仙長年金華玉堂白虎麒麟區
宇若茲不可殫論增盤業峨升降炤爛殊形詭制每各
異觀乘茵步輦惟所息宴後宮則有掖庭椒房后妃之
室合歡增城安處常寧茝若椒風披香發越蘭林蕙草
鴛鸞飛翔之列昭陽特盛隆於孝成屋不呈材牆不露

形襄以藻繡絡以綸連隋侯明月錯落其間金缸銜璧
是為列錢翡翠火齊流耀含英懸黎垂棘夜光在焉於
是玄墀釦砌玉階彤庭硬礮絲綴琳珉青熒珊瑚碧樹
周阿而生紅羅颯纏綺組縵紛精曜華燭俯仰如神後
宮之號十有四位窈窕繁華更盛迭貴處乎斯列者蓋
以百數左右庭中朝堂百寮之位蕭曹魏邴謀謨乎其
上佐命則垂綰輔翼則成化流大漢之愷悌蕩亡秦之
毒螯故令斯人揚樂和之聲作畫一之歌功德著乎祖

宗膏澤洽乎黎庶又有天祿石渠典籍之府命夫博誨
故老名儒師傳講論乎六藝稽合乎同異又有永明金
馬著作之庭大雅宏達於茲為羣元元本本殫見洽聞
啓發篇章校理秘文周以鈎陳之位衛以嚴更之署總
禮官之甲科羣百郡之廉孝虎賁贊衣闈尹閻寺陞戟
百重各有典司周廬千列徼道綺錯輦路經營修塗飛
閣自未央而連桂宮北彌明光而亘長樂陵燈道而超
西墉搆建章而連外屬設屏門之鳳闕上觚稜而棲金

爵內則別風嶢嶢玲瓏巧而聳擢張千門而立萬戶順
陰陽以開闔爾乃正殿崔巍層構厥高臨乎未央經駘
盪而出駁娑洞杪詣以與天梁上反宇以益戴激日景
而納光神明鬱其特起遂偃蹇而上躋軼雲雨於大半
虹霓迺帶於棼楣雖輕迅與僕狡猶愕眙而不能階攀
井幹而未半目眩轉而意迷捨櫺檻而却倚若顛墜而
復稽覩怳怳以失度巡迴途而下低既懲懼於登望降
周流以彷徨步甬道以縈紆又杳察而不見陽排飛闔

而上出若遊目於天表似無依而洋洋前唐中而後太
液覽滄海之湯湯揚波濤於碣石激神岳之嶽嶽濫瀛
洲與方壺蓬萊起乎中央於是靈草冬榮神木叢生巖
峻嶒崕金石崢嶸抗仙掌以承露擢雙立之金莖軼埃
燭之混濁鮮顎氣之清英騁文成之丕誕馳五利之所
刑庶松喬之羣類時遊從乎斯庭實列仙之攸館非吾
人之所寧爾乃盛娛遊之壯觀奮大武乎上囿因茲以
威戎夸狄耀威靈而講武事命荊州使起鳥詔梁野而

驅獸毛羣內闖飛羽上覆接翼側足集禁林而屯聚水
衡虞人修其營表種別羣分部曲有署罿網連紜籠山
絡野列卒周匝星羅雲布於是乘鸞輿備法駕帥羣臣
披飛廉入苑門遂繞酆鄗歷上蘭六師發逐百獸駭蟬
震震爚爚雷奔電激草木塗地山淵反覆蹂躪其十二
三乃抑怒而少息爾乃期門佽飛列刃攢鏑要趺追蹤
鳥驚觸絲獸駭值鋒機不虛掎弦不再控矢不單殺中
必疊雙胞胞紛紛矰繳相纏風毛雨血灑野蔽天平原

赤勇士厲援抗失木豺狼憚竄爾乃移師趨險並踰潛
穢窮虎奔突狂兕觸蹶許少施巧秦成力折掎儻狡扼
猛噬脫角挫脰徒搏獨殺挾師豹拖熊螭曳犀犧頓象
熊超洞壑越峻崖蹶嘶巖巨石頽松栢仆叢林摧草木
無餘禽獸殄夷於是天子乃登屬玉之館厯長楊之榭
覽山川之體勢觀三軍之殺獲原野蕭條日極四裔禽
相鎮壓獸相枕藉然後收禽會衆論功賜胙陳輕騎以
行烹騰酒車以斟酌割鮮野食舉烽命爵饗賜畢勞逸

齊大輶鳴鑾容與徘徊集乎豫章之宇臨乎昆明之池
左牽牛而右織女似雲漢之無涯茂樹蔭蔚芳草被隄
蘭茝發色暭暭猗猗若摛錦與布繡爛耀乎其陂鳥則
元鶴白鷺黃鵠鷁鶴鷁鷀鷂鳬鷺鴻鴈朝發河海夕
宿江漢沈浮往來雲集霧散於是後宮乘轂輶登龍舟
張鳳蓋建華旗祛黼帷鏡清流靡微風澹淡浮耀女謳
鼓吹震聲激越營厲天鳥羣翔魚窺淵招白鷗下雙鵠
投文竿出比目撫鴻置御矰繳方舟並駕俛仰極樂遂

乃風舉雲搖浮遊溥覽前乘秦嶺後越九嶠東薄河華
西涉岐雍宮館所厯百有餘區行止朝夕儲不改供禮
上下而接山川究休佑之所用采遊童之歡謠第從臣
之嘉頌於斯之時都都相望邑邑相屬國籍十世之基
家承百年之業士食舊德之名氏農服先疇之畝畝商
循族世之所鬻工用高曾之規矩榮乎隱隱各得其所
若臣者徒觀迹於舊墟聞之乎故老十分未得其一端
故不能偏舉也

東都賦

東都主人喟然而歎曰痛乎風俗之移人也子實秦人
矜夸館室保界河山信識昭襄而知始皇矣烏覩大漢
之云為乎夫大漢之開元也奮布衣以登皇位由數朞
而創萬代蓋六籍所不能談前聖靡得而言焉當此之
時攻有橫而當天討有逆而順民故婁敬度勢而獻其
說蕭公權宜而拓其制時豈泰而安之哉計不得以已
也吾子曾不是睹顧曜後嗣之永造不亦暗乎今將語

予以建武之治永平之事監于太清以變子之惑志往
者王莽作逆漢祚中缺天人致誅六合相滅于時之亂
生民幾亡鬼神泯絕壑無完柩郊罔遺室原野厭人之
肉川谷流人之血秦項之災猶不克半書契以來未之
或紀故下人號而上訴上帝懼而降監乃致命乎聖皇
於是聖皇乃握乾符闡坤珍披皇圖稽帝文赫然發憤
應若興雲霆擊昆陽憑怒雷震遂超大河跨北嶽立號
高邑建都河洛紹百王之荒屯因造化之盪滌體元立

制繼天而作系唐統接漢緒茂育羣生恢復疆宇勲兼
乎在昔事勤乎三五豈特方軌竝跡紛綸后辟治近古
之所務蹈一聖之險易云爾且夫建武之元天地革命
四海之內更造夫婦肇有父子君臣初建人倫寔始斯
乃伏羲氏之所以基皇德也分州土立市朝作舟輿造
器械斯乃軒轅氏之所以開帝功也冀行天罰應天順
人斯乃湯武之所以昭王業也遷都改邑有殷宗中興
之則焉即土之中有周成隆平之制焉不階尺土一人

之柄同符乎高祖克已復禮以奉終始允恭乎孝文憲
章稽古封岱勒成儀炳乎世宗按六經而校德眇古昔
而論功仁聖之事既該而帝王之道備矣至於永平之
際重熙而累洽盛三雍之上儀脩袞龍之法服鋪鴻藻
信景鑠揚世廟正雅樂神人之和允洽羣臣之序既肅
乃動大輶遵皇衢省方巡狩窮覽萬國之有無考聲教
之所被散皇明以燭幽然後增周舊脩洛邑扇巍巍顯
翼翼光漢京于諸夏總八方而為之極是以皇城之內

宮室光明闢庭神麗奢不可踰儉不能侈外則因原野
以作苑順流泉而為沼發蘋藻以潛魚豐圃草以毓獸
制同乎梁鄒誼合乎靈園若乃順時節而蒐狩簡車徒
以講武則必臨之以王制考之以風雅歷騶虞覽駟驥
嘉車攻采吉日禮官整儀乘輿乃出於是發鯨魚鏗華
鐘登玉輅乘時龍鳳蓋棽麗和鑾玲瓏天官景從寢威
盛容山靈護野屬御方神雨師泛灑風伯清塵千乘雷
起萬騎紛紜元戎竟野戈鋌彗雲羽旄掃霓旌旗拂天

炎炎炎炎揚光飛文吐燭生風飲野歛山日月為之奪
明丘陵為之搖震遂集乎中園陳師案屯駢部曲列校
隊勒三軍誓將帥然後舉烽伐鼓申令三驅輕車霆激
驍騎電驚由基發射范氏施御弦不羨禽轡不詭遇飛
者不及翔走者不及去指顧倏忽獲車已寶樂不極盤
殺不盡物馬蹠餘足士怒未涼先驅復路屬車按節於
是薦三犧效五牲禮神祇懷百靈覲明堂臨辟雍揚緝
熙宣皇風登靈臺考休徵俯仰乎乾坤參象乎聖躬目

中夏而布德瞰四裔而抗稜西盪河源東澹海滑北動
幽崖南曜朱垠殊方別區界絕而不隣自孝武之所不
征孝宣之所未臣莫不陸誓水慄奔走而來賓遂綏哀
牢開永昌春王三朝會同漢京是日也天子受四海之
圖籍膺萬國之貢珍內撫諸夏外綏百蠻爾乃盛禮興
樂供帳置乎雲龍之庭陳百寮而贊羣后究皇儀而展
帝容於是庭實千品旨酒萬鍾列金罍班玉觴嘉珍御
太牢饗爾乃食舉雍徹大師奏樂陳金石布絲竹鐘鼓

鏗鈞管弦曉煜抗五聲極六律歌九功舞八佾韶舞備
泰古畢四夷間奏德廣所極儕休兜離罔不具集萬樂
備百禮暨皇歡浹羣臣醉降烟燭調元氣然後撞鐘告
罷百寮遂退於是聖上覩萬方之歡娛又沐浴於膏澤
懼其侈心之將萌而急於東作乃申舊章下明詔命有
司班憲度昭節儉示太素去後宮之麗飾捐乘輿之服
御抑工商之淫業興農桑之盛務遂令海內棄末而反
本背偽而歸真女修織紝男務耕耘器用陶匏服尚素

玄心纖靡而不服賤奇麗而不珍捐金於山沈珠於淵
於是百姓滌瑕盪穢而鏡至清形神寂寥耳目不營嗜
慾之源滅廉恥之心生莫不優游而自得玉潤而金聲
是以四海之內學校如林庠序盈門獻酬交錯俎豆莘
莘下舞上歌謳德詠仁升降飲宴之禮既畢因相與嗟
歎玄德讜言弘說咸含和而吐氣頌曰盛哉乎斯世今
論者但知誦虞夏之書詠殷周之詩講羲文之易論孔
氏之春秋罕能精古今之清濁究漢德之所由唯子頤

識舊典又徒馳騁乎末流溫故知新已難而知德者鮮矣且夫僻界西戎險阻四塞脩其防禦孰與處乎土中平夷洞達萬方輻湊秦嶺九峻涇渭之川曷若四瀆五嶽帶河沂洛圖書之淵建章甘泉館御列仙孰與靈臺明堂統和天人太液昆明鳥獸之園曷若辟雍海流道德之富游俠踰侈犯義侵禮孰與同履法度翼翼濟濟子徒習秦阿房之造天而不知京洛之有制識函谷之可闢而不知王者之無外主人之辭未終西都賓饗然

失容逡巡降階慄然意下捧手欲辭主人曰復位今將
授子五篇之詩賓既卒業乃稱曰美哉乎斯詩義正乎
揚雄事實乎相如匪唯主人之好學蓋乃遭遇乎斯時
小子狂簡不知所裁既聞正道請終身而誦之其詩曰

明堂詩

於昭明堂明堂孔陽聖皇宗祀穆穆煌煌上帝宴饗五
位時序誰其配之世祖光武普天率土各以其職猗歟

緝熙允懷多福

辟雍詩

乃流辟雍辟雍湯湯聖皇蒞止造舟為梁皤皤國老乃父乃兄抑抑威儀孝友光明於赫太上示我漢行洪化惟神永觀厥成

靈臺詩

乃經靈臺靈臺既崇帝勤時登爰考休徵三光宣精五行布序習習祥風祁祁甘雨百穀蓁蓁庶草蕃蕪屢惟豐年於皇樂胥

寶鼎詩

獻脩貢兮川效珍吐金景兮歛浮雲寶鼎見兮色紛縕
煥其炳兮被龍文登祖廟兮享聖神昭靈德兮彌億年

白雉詩

啓靈篇兮披瑞圖獲白雉兮效素鳥嘉祥阜兮集皇都
發皓羽兮奮翹英容潔朗兮於淳精彰皇德兮侔周成
永延長兮膺天慶

幽通賦

系高頃之玄胄兮氏中葉之炳靈飄凱風而蟬蛻兮雄
朔野以颺聲皇十紀而鴻漸兮有羽儀於上京臣滔天
而泯夏兮考遘愍以行誼終保已而貽則兮里上仁之
所廬懿前烈之純淑兮窮與達其必濟咨孤蒙之眇眇
兮將圯絕而罔階豈余身之足殉兮違世業之可懷靖
潛處以永思兮經日月而彌遠匪黨人之敢拾兮庶斯
言之不玷堦堦與神交兮精誠發於宵寐夢登山而
迥眺兮覲幽人之髮鬚攬葛藟而授余兮眷峻谷曰勿

墜盼所寤而仰思兮心矇矇猶未察黃神邈而靡質兮
儀遺識以臆對曰乘高而逆神兮道遐通而不迷葛繇
繇於穆木兮詠南風以為綏蓋惴惴之臨深兮乃二雅
之所祇既訊爾以吉象兮又申之以炯戒盍益晉以迨
羣兮辰倏忽其不再承靈訓其虛徐兮佞性桓而且俟
惟天地之無窮兮鮮生民之晦在紛屯遭與蹇連兮何
艱多而知寡上聖迂而後拔兮豈羣黎之所禦昔衛叔
之御昆兮昆為寇而喪予管彎弧欲斃讐兮讐作后而

成已變化故而相詭兮孰云預其終始雍造怨而先賞
兮丁因惠而被戮栗取弔于由吉兮王膺慶於所蹙叛
迴穴其若茲兮壯叟頗識其倚伏單治裏而外凋兮張
修繹而內逼聿中和為庶幾兮顏與冉又不得溺招路
以從已兮謂孔氏猶未可安惄惄而不葩兮卒隕身乎
世禍遊聖門而靡救兮雖覆醢其何補固行行其必凶
兮免盜亂為賴道形氣發于根柢兮柯葉彙而靈茂恐
罔兩之責影兮羌未得其云已黎淳耀于高辛兮芊疆

大於南氾羸取威於百儀兮姜本支乎三趾既仁得其
信然兮仰天路而同軌東鄰虐而殲仁兮王合位乎三
五戎女烈而喪孝兮伯祖歸於龍虎發還師以成命兮
重醉行而自耦震鱗漦于夏庭兮匝三正而滅姬翼羽
化乎宣宮兮彌五辟而成災道修長而世短兮夐冥默
而不周胥仍物而鬼諛兮乃窮宇宙而達幽媯巢姜於孺
筮兮旦筭祀於契龜宣曹興敗於下夢兮魯衛名謐於
銘謠妣聆呱而効石兮許相理而鞠條道混成而自然

兮術同原而分流神先心以定命兮命隨行以消息幹
流遷其不濟兮故遭罹而羸縮三樂同於一體兮雖移
易而不忒洞參差其紛錯兮斯衆兆之所惑周賈盪而
貢儕兮齊死生於禍福抗炎言以矯情兮信畏犧而忌
鵬所貴聖人之至論兮順天性而斷誼物有欲而不居
兮亦有惡而不避守孔約而不貳兮乃轉德而無累三
仁殊於一致兮夷惠異而齊聲未偃息以蕃魏兮申重
繭以存荆紀焚身以衛上兮皓頤志而弗傾侯草木之

區別兮苟能實其必榮要沒世而不朽兮乃先民之所
程觀天網之絃覆兮實棐谌而相訓謨先聖之大猷兮
亦隣德而助信虞韶美而儀鳳兮孔忘味於千載素文
信而底麟兮漢賓祚于異代精通靈而感物兮神動氣
而入微養流睇而猿號兮李虎發而石開非精誠其焉
通兮苟無實其孰信操末伎猶必然兮矧耽躬於道真
登孔昊而上下兮緯羣龍之所經朝貞觀而夕化兮猶
誼已而遺形若肩彭而偕老兮訴來哲而通情亂曰天

造草昧立性命兮復心弘道惟聖賢兮渾元運物流不
處兮保身遺名民之表兮舍生取誼亦道用兮憂傷天
物忝莫痛兮皓爾太素曷渝色兮尚越其幾淪神域兮

終南山賦

伊彼終南歸巒嶧嶢困槩青宮觸紫宸巔峯巒律萃于霞
芬曖曖掩靄若鬼若神傍吐飛瀨上挺修林立泉落落
密雲沉沉榮期綺季此焉恬心三春之季益夏之初天
氣肅清周覽八隅皇鸞鸞鷺警乃前驅爾其珍恆碧玉

挺其阿密房溜其巔翔鳳哀鳴集其上清水必流注其前彭祖宅以蟬蛻安期饗以延年唯至德之為美我皇應福以來臻掃神壇以告誠薦珍馨以祈仙嗟茲介福永終億年

覽海賦

余有事於淮浦覽滄海之茫茫悟仲尼之乘桴聊從容而遂行馳鴻瀨以漂鷺翼飛風而迴翔顧百川之分流煥爛熳以成章風波薄其裏邈浩浩以湯湯指日月

以為表索方瀛與壺梁曜金璆以為闕次玉石而為堂
蓂芝列於階路涌醴漸於中唐朱紫彩潤明珠夜光松
喬坐於東序王母處於鹵廂命韓衆與岐伯講神篇而
校靈章願結旅而自託因離世而高遊騁飛龍之驂駕
歷八極而迴周遂竦節而響應忽輕舉以神浮導霓霧
之掩蕩登雲塗以凌厲乘虛風而體景超太清以增逝
麾天闔以啓路闢閭闔而望余通王謁於紫宮拜太乙
而受符

遊居賦

夫何事於冀州聊託公以遊居歷九土而觀風亦哲人之所虞遂發軫於京洛臨孟津而北厲想尚甫之威虞號蒼兕而明誓既中流而歎息美周武之知性謀人神以動作言烏魚之瑞命瞻淇澳之園林善綠竹之猗猗望常山之峩峩登北嶽而高遊嘉孝武之乾乾親飾躬於伯姬建封禪於岱宗瘞玄玉於此丘徧五岳與四瀆觀滄海以周流鄙臣恨不及事陪後乘之下僚今匹馬

之獨征豈斯樂之足娛且休精於敝邑聊卒歲以須臾

竹扇賦

青青之竹形兆直妙華長竿紛寔翼杳篠叢生於水澤
疾風時紛紛蕭颯削為扇翫成器美託御君王供時有
度量異好有圓方來風辟暑致清涼安體定神達消息
百王傳之賴功力壽考康寧累萬億

表

為第五倫薦謝夷吾表

臣聞堯登稷契治隆太平舜用皋陶政致雍熙殷周雖有高宗昌發之君猶賴傅說呂望之策故能克崇其業允協大中竊見鉅鹿太守會稽謝夷吾出自東州厥土塗泥而英資挺特奇偉秀出才兼四科行包九德仁足濟時知周萬物加以少膺儒雅韜含六籍推考星度綜校圖錄探蹟聖祕觀變歷徵占天知地與神合契據其道德以經王務昔為陪隸與臣從事奮忠義之操躬史魚之節董臣嚴綱勦臣懦弱得以免戾實賴厥勲及其

應選作宰惠敷百里降福彌異流化若神爰牧荊州威
行邦國奉法作政有周召之風居儉履約紹公儀之操
尋功簡能為外臺之表聽聲察實為九伯之寇遷守鉅
鹿政合時雍德量績謀有伊呂管晏之任闡弘道與同
史蘇京房之倫雖密勿在公而身出心隱不殉名以求
譽不馳騖以要寵念存遜遁演志箕山方之古賢實有
倫序採之於今超然絕俗誠社稷之元龜大漢之棟甍
宜當拔擢使登鼎司上令三辰順軌於厯象下使五品

咸訓於嘉時必致休徵克昌之慶非徒循法奉職而已
臣以頑鴟器非其疇尸祿負乘夕惕若厲願乞骸骨更
授夷吾上以光七曜之明下以厭率土之望庶令微臣
塞咎免悔

奏記

奏記東平王蒼

將軍以周召之德立乎本朝承休明之策建威靈之號
皆在周公今也將軍詩書所載未有三此者也傳曰必

有非常之人然後有非常之事有非常之事然後有非常之功固幸得生於清明之世豫在視聽之末私以謾
竊觀國政誠美將軍擁千載之任躡先聖之蹤體弘
懿之姿據高明之執博貫庶事服膺六藝白黑簡心求
善無厭採擇狂夫之言不逆負薪之議竊見幕府新開
廣延羣俊四方之士顛倒衣裳將軍宜詳唐殷之舉察
伊皋之薦令遠近無偏幽隱必達期於總攬賢才收集
明智為國得人以寧本朝則將軍養志和神優游廟堂

光名宣於當世遺烈著於無窮竊見故司空掾桓梁宿
儒盛名冠德州里七十從心行不踰矩蓋清廟之光輝
當世之俊彥也京兆祭酒晉馮結髮修身白首無違好
古樂道玄默自守古人之美行時俗所莫及扶風掾李
育經明行著教授百人客居杜陵茅室土階京兆扶風
二郡更請徒以家貧數辭病去溫故知新論議通明廉
清修潔行能純備雖前世名儒國家所器韋平孔翟無
以加焉宜令考績以參萬事京兆督郵郭基孝行著於

州里經學稱於師門政務之績有絕異之效如得及明
時秉事下僚進有羽翮奮翔之用退有杞梁一介之死
涼州從事王雍躬卞嚴之節文之以術藝涼州冠蓋未
有宜先雍者也古周公一舉則三方怨曰奚為而後已
宜及府開以慰遠方弘農功曹史殷肅達學洽聞才能
絕倫誦詩三百奉使專對此六子者皆有殊行絕才德
隆當世如蒙徵納以輔高明此山梁之秋夫子所為歎
也昔卞和獻寶以離斷趾靈均納忠終於沈身而和氏

之辟千載垂光屈子之篇萬世歸善願將軍隆照微之

明信日昇之聽少屈威神咨嗟下問今塵埃之中永無

荆山汨羅之恨

殷肅固集作段肅六子惟李育見後漢儒林傳育字元春扶風漆人仕為博士

選侍中擁一作膺斷趾作折趾沈

身下一有已字歸善一作彌章

牋

與竇憲牋

六首

今月中舍以令賜固刀把曰此大將軍少小時所服今

賜固伏念大恩且喜且慙

又

將軍哀憐賜以玉躬所喜駭犀玳瑁簪絳單衣以繆縞
之質被服鸞鳳之彩飾尺牘遺鳳字

又

將軍哀憐賜固手迹告以中軍宜鮮明乃賜以璫瑁簪
絳紗單衣

又

固於張掖縣受賜虎頭繡盤單囊一雙

又

復賜犀毗金頭帶此將軍所自帶也

又

將軍憐固乃賜以玉躬所著璫珮襪三具

書

與弟超書

九首

傅武仲以能屬文為蘭臺令史下筆不能自休

又

徐幹字伯章扶風平陵人官至班超軍司馬善章草固與超書稱之

得伯章書藁勢殊工知識讀之莫不歎息實亦藝由已
立名自人成

又

寶侍中遺仲升楚騰陵錯橫刀瑣阜削一枚金錯半垂
刀一枚

又

寶侍中令載雜綵七百足市月氏馬蘇合香

又

寶侍中前寄人錢八十萬市得雜罽十餘張也

又

月支鈕大小相雜但細好而已

又

今賣白素三百疋欲以市月支馬蘇合香闌登

又

遺仲升虎頭金鞶囊金鉤

又

今遺仲升璫瑁黑犀簪

與陳文通書

奉國威靈信志方外

議

匈奴和親議

竊自惟思漢興已來曠世厯年兵纏夷狄尤事匈奴綏御之方其塗不一或修文以和之或用武以征之或卑下以就之或臣服而致之雖屈申無常所因時異然未

有拒絕棄放不與交接者也故自建武之世復修舊典
數出重使前後相繼至於其末始乃暫絕永平八年復
議通之而廷爭連日異同紛回多執其難少言其易先
帝聖德遠覽瞻前顧後遂復出使事同前世以此而推
未有一世闕而不修者也今烏桓就闕稽首譯官康居
月氏自遠而至匈奴離析名王來降三方歸服不以兵
威此誠國家通於神明自然之徵也臣愚以為宜依故
事復遣使者上可繼五鳳甘露致遠人之會下不失建

武永平羈縻之義虜使再來然後一往既明中國主在忠信且知聖朝禮義有常豈可逆詐示猜孤其善意乎絕之未知其利通之不聞其害設後北敵稍彊能為風塵方復求為交通將何所及不若因今施惠為策近長

符命

典引

有序

蔡邕註

臣固言永平十七年臣與賈逵傅毅杜矩展隆郗萌等召詣雲龍門小黃門趙宣持秦始皇帝本紀問臣等曰

太史遷下贊語中寧有非邪臣對此贊賈誼過秦篇云
向使子嬰有庸主之才僅得中佐秦之社稷未宜絕也
此言非是即召臣入問本聞此論非邪將見問意開寤
耶臣具對素聞知狀詔因曰司馬遷著書成一家言揚
名後世至以身陷刑之故反微文刺譏貶損當世非誼
士也司馬相如洿行無節但有浮華之詞不周於用至
於病疾而遺忠主上求取其書竟得頌述功德言封禪
事忠臣效也至是賢遷遠矣臣固常伏刻誦聖論昭明

好惡不遺微細緣事斷誼動有規矩雖仲尼之因史見
意亦無以加臣固被學最舊受恩浸深誠思畢力竭情
昊天罔極臣固頓首頓首伏惟相如封禪靡而不典揚
雄美新典而亡實然皆游揚後世垂為舊式臣固才朽
不及前人蓋詠雲門者難為音觀隨和者難為珍不勝
區區竊作典引一篇雖不足雍容明盛萬分之一猶啓
發憤懣覺悟童蒙光揚大漢軼聲前代然後退入溝壑
死而不朽臣固愚贊頃首頓首曰

太極之元兩儀始分烟烟煴煴

易太極是生兩儀烟烟
煴煴陰陽和一相扶貌

也有沈而奧有浮而清

奧濁也言兩儀始分之時其氣
和同沈而濁者為地浮而清者

為沈浮交錯庶類混成

地體沈而氣升天道浮而氣
降升降交錯則衆類同矣

命民主五德初起

民主者天子也尚書曰成湯簡代夏
作民主五德五行之德自伏羲已下

帝王相代各據其一行始於木終於水則復始也

同于草昧玄混之中

易曰天造草昧

溷溷踰繩越契寂寥而亡詔者系不得而綴也

言結繩書契已往

其道寂寥無聲莫能以相告故易系不得紹連也綴知銳切

厥有氏號紹天闡繹莫

不開元於太昊皇初之首上哉夐乎其書猶可得而修

所依為氏也號功之表也號太昊曰伏羲炎帝曰神也農黃帝曰軒轅少昊曰金天顙頃曰高陽帝嚳曰高

辛堯曰陶唐舜曰有虞紹天
闡繹宗紹天地開道人事

亞斯之世通變神化函光

而未曜若夫上稽乾則降承龍翼而炳諸典謨以冠德卓絕者莫崇乎陶唐陶唐舍肩而禪有虞有虞亦命夏后稷契熙載越成湯武股肱既周天迺歸功元首將授漢劉正天有五行之序堯與四臣各據其一行而堯為之四臣已偏故歸功元首之子孫而授漢劉也高祖始於沛公起兵入關後為漢王以即尊位故遂曰漢也春秋左氏傳曰陶唐氏既衰其後劉累者在夏為御龍氏在商為豕韋氏在周為唐杜氏成王滅唐宣王殺杜伯杜伯之子隰叔奔晉其後士會奔秦而復歸其子

留秦者為劉氏以是明之漢為堯後

俾其承三季之荒末值亢龍之災孽

皆不毀廟之稱也言仲尼之作亦顯助祖宗揚明其臨詰之德

相助也始受命為祖繼中為宗

學立制宏量洪業表相祖宗贊揚迪哲備哉粲爛真聖明之式

雖臯夔衡旦密勿之輔比茲褊矣

茲子也

是以高光二聖

宸居其域

言高祖光武如北辰居其所而衆星拱之

時至氣動乃龍見淵躍

拊翼而未舉則威靈紛紜海內雲蒸雷動電熛胡縊莽

分尚不泣其誅

言二祖即位胡亥王莽皆先已誅天之所為先除也

然後欽若上

下恭輯羣后正位度宗

度居也 宗尊也 言二主既除亂
諸侯推而尊之然後敬順天地

恭輯諸侯正位居尊也

有于德不台淵穆之讓

淵曾深美之辭也

靡號師

矢敦奮撫之容

矢陳也 敦勉也 氏曰 矢於牧野

蓋以膺當天之正統

受克讓之歸運蓄炎上之烈精蘊孔佐之弘陳云爾

謂大漢之德也 蓄聚也

洋洋乎若德帝者之上儀誥誓所不及已

本事

曰誥戎事曰誓

鋪觀二代洪纖之度其蹟可探也

洪大也 細也

並開

迹於一簣同受侯甸之服奕世勤民以方伯統牧乘其

命賜彤弧黃鉞之威用討韋顧黎崇之不恪

韋豕韋顧已姓之國

皆夏諸侯黎崇殷諸侯也湯文王誅之毛詩曰韋顧既伐又曰既伐於崇作邑於豐書曰西伯既戡黎至

于參五華夏京遷鎬毫遂自北面虎螭其師草滅天邑

天下天子邑也是故誼士華而不敦武稱未盡濩有慙德不其

然與

武周樂也濩殷樂也孔子曰韶盡美矣又盡善也謂武盡美矣未盡善也舜禪而周伐故未盡善也

延陵季子聘魯觀樂見舞大濩者曰聖人之弘也而猶有慙德恥於始伐也豈不然乎亦猶於穆

猗那翕純皦繹

周頌曰於穆清廟商頌曰猗歟那歟孔子曰始作翕如也從之純如也皦如也

繹如以崇嚴祖考殷薦宗配帝發祥流慶對越天地者也

對答鳴奕乎千載豈不克自神明哉

鴻奕光耀流行貌

誕略有

常審言行於篇籍光藻朗而不渝耳矧夫赫赫聖漢巍

巍唐基沂測其源乃先孕虞育夏甄殷陶周

言測度漢本至唐乃

任舜育禹化契成稷然後宣二祖之重光襲四宗之緝

皆為之父母模範也熙宣偏也襲因也高祖光武為二祖孝文曰太宗孝武

熙曰世宗孝宣曰中宗孝明曰顯宗二祖重光天下四

宗盛美相神靈日照光被六幽

六幽謂上下四方也尚書曰光被四表格于上

因而起也下仁風翔乎海表威靈行乎鬼區

鬼區絕遠也鬼區也

慝亡回而不

泯微胡瑕而不頤故夫顯定三才昭登之績匪堯不

興言明定天地人之道明登天之功非堯莫能興也尚書曰昭登于上鋪聞遺策在下之

訓匪漢不弘厥道至於經緯乾坤出入三光

言使日月星辰出以

其節入以其期亡胸
朓側匪盈縮之異也

外運渾元內霑豪芒性類循理品

物咸亨其已久矣盛哉皇家帝世德臣列辟功君百王

榮鏡宇宙尊亡與亢

四表曰宇往古來今曰宙

乃始虔鞶勞謙兢兢

業業貶成抑定不敢論制作

鞶亦勞也

至於遷正黑色賓監

之事渙揚寢內

漢承周後當就夏正以十二月為年首而秦以十月為年首高祖又以十月至

霸上因而不改至武帝太初始改焉賈誼公孫臣等議以漢土德服色尚黃至光武中乃黜黃而尚赤立殷後

曰紹嘉公周後曰承休公以賓而監二代矣於四者宣揚海內制作之事猶未章也

而禮官儒林

屯用篤誨之士不傳祖宗之髣髴雖云優慎無乃憲與
於是三事岳牧之寮僉爾而進曰慎而無禮則蕙陛下仰監唐
典中述祖則俯蹈宗軌躬奉天經惇睦辨章之化洽巡
靖黎蒸懷保鰥寡之惠浹懷安也保養也燔瘞懸沈肅祇羣神
之禮備是以來儀集羽族於觀魏貌恭體仁則鳳皇來儀肉角馴
毛宗於外囿視明禮修則麒麟來應擾緇文皓質於郊思睿信立則白虎擾甘露宵零於豐草德至天則甘露降三足軒翥於茂樹鳥反哺之鳥至孝之應也若乃嘉穀靈草奇獸

神禽應圖合謀窮祥極瑞者朝夕坰牧

天子寰內也

日月邦

畿卓犖方州洋溢乎要荒昔周姬有素雉朱鳥玄秬黃

鸞之事耳君臣動色左右相趨濟濟翼翼峨峨如也蓋

用昭明夤畏永聿懷之福

毛詩曰昭事上帝聿懷多福

亦以寵靈文

武貽燕後昆復以懿饒豈其為身而有穎辭也若然受

之亦宜勤恁旅力以充厥道

恁思也旅陳也

啟恭館之金縢御

東序之秘寶以流其占

恭館宗廟金縢之所在東序牆也尚書曰顓頊項河圖洛書在東

序流演也雖書皆存亡之事尚覽之以演禍福之驗也

夫圖書亮章天哲也

亮信也

明也言河圖洛書至信至明
而出天賜之使視而行之

孔繇先命聖孚也

繇道也言孔子

先定道誠體行德本至性也

體行正性習堯所履今天子復蹈之

辰景命也

言逢此吉當此時者皇天之大命也

順命以創制

易曰湯武革命順乎天應

人因定以和神答三靈之蕃祉展放唐之明

大茲事體大而允寤寐次於心瞻前顧後豈蔑清廟憚

勑天命也伊考自遂古乃降戾爰茲作者七十有四人

有不俾而假素罔光度而遺章今其如台而獨闕也是

時聖上固以垂精遊神苞舉藝文屢訪羣儒俞咨故老

與之斟酌道德之淵源者覈仁義之林藪以望元符之

臻焉

斟酌飲也肴覈食也肉曰肴骨曰覈水深曰淵水本曰源叢木曰林澤無水曰叢言六藝者道德之

深本而仁誼之叢叢也天子與羣儒故老斟酌肴覈而行以天應之至也詩曰洞酌波行潦又曰肴覈惟旅

既感羣后之讌辭又悉經五繇之顧慮矣

讌當也經常也繇占也王者

者巡狩預卜五年歲習其祥習則行不則修德而改卜言天下已舉五卜之占而習吉也將絳萬嗣

揚洪輝奮景炎

揚奮皆振布之意

扇遺風播芳烈久而逾新用

而不竭汪汪乎丕天之大律其疇能亘之哉唐哉皇哉

皇哉唐哉

言誰能竟此道惟唐堯與漢漢與唐堯而已

設難

答賓戲

有序

永平中為郎典校秘書專篤志於儒學以著述為業或
譏以無功又感東方朔揚雄自喻以不遭蘇張范蔡之
時曾不折之以正道明君子之所守故聊復應焉其辭
曰

賓戲主人曰蓋聞聖人有一定之論烈士有不易之分
亦云名而已矣故太上有立德其次有立功夫德不得

後身而特盛功不得背時而獨彰是以聖詰之治棲棲
遑遑孔席不暇墨突不黔由此言之取舍者昔人之上
務著作者前烈之餘事耳今吾子幸游帝王之世躬帶
紱冕之服浮英華湛道德簪龍虎之文舊矣卒不能攄
首尾奮翼鱗振拔洿塗跨騰風雲使見之者影駭聞之
者響震徒樂枕經籍書紓體衡門上無所蒂下無所根
獨據意乎宇宙之外銳思於毫芒之內潛神默記組以
年歲然而器不賈於當已用不效於一世雖馳辯如濤

波摛藻如春華猶無益於殿最也意者且運朝夕之策
定合會之計使存有顯號亡有美謚不亦優乎主人適
爾而笑曰若賓之言所謂見世利之華闇道德之實守
突與之熒燭未仰天庭而覩白日也曩者王塗蕪穢周
失其馭侯伯方軌戰國橫駕於是七雄虓闢分裂諸夏
龍戰虎爭游說之徒風颶電激並起而救之其餘焱飛
景附雲煜其間者蓋不可勝載當此之時搦朽磨鈍鉉
刀皆能一斷是故魯連飛一矢而蹶千金虞卿以顧盼

而捐相印夫歟發投曲感耳之聲合之律度淫韻而不
可聽者非韶夏之樂也因勢合變偶時之會風移俗易
乖迕而不可通者非君子之法也及至從人合之衡人
散之亡命漂說羈旅騁辭商鞅挾三術以鑽孝公李斯
奮時務而要始皇彼皆躡風塵之會履顛沛之勢據微
乘邪以求一日之富貴朝為榮華夕為傾頽福不盈臂
禍溢於世凶人且以自悔况吉士而是賴乎且功不可
以虛成名不可以偽立韓設辯以激君呂行詐以賈國

說難既遁其身乃囚秦貨既貴厥宗亦墜是以仲尼抗
浮雲之志孟軻養浩然之氣彼豈樂為迂濶哉道不可
以貳也方今大漢洒掃羣獮夷險芟荒廓帝紘恢皇綱
基隆於羲農規廣於黃唐其君天下也炎之如日威之
如神函之如海養之如春是以六合之內莫不同源共
流沐浴玄德稟仰太和枝附葉著僻猶草木之植山林
鳥魚之毓川澤得氣者蕃滋失時者零落參天地而施
化豈云人事之厚薄哉今吾子處皇代而論戰國曜所

聞而疑所覩欲從整敦而度高乎泰山懷汎濫而測深
乎重淵亦未至也賓曰若夫鞅斯之倫哀周之凶人既
聞命矣敢問上古之士處身行道輔世成名可述於後
者默而已乎主人曰何為其然也昔者咎繇謨虞箕子
訪周言通帝王謀合神聖殷說夢發於傅巖周望兆動
於渭濱齊寧激聲於康衢漢良受書於邳垠皆俟命而
神交匪詞言之所信故能建必然之策展無窮之勲也
近者陸子優游新語以興董生下帷發藻儒林劉向司

籍辯章舊聞揚雄譚思法言太玄皆及時君之門闈究先聖之壺奥婆娑乎術藝之場休息乎篇籍之園以全其質而發其文用納乎聖德烈炳乎後人斯非其亞歟若乃伯夷抗行於首陽柳惠降志而辱仕顏潛樂於簞瓢孔終篇於西狩聲盈塞於天淵真吾徒之師表也且吾聞之一陰一陽天地之方乃丈乃質王道之綱有同有異聖哲之常故曰慎修所志守爾天符委命供己味道之腴神之聽之名其舍諸賓又不聞和氏之璧韞於

荆石隋侯之珠藏於蚌蛤乎歷世莫眠不知其將含景
曜吐英精曠千載而流光也應龍潛於潢汙魚鼈媒之
不覩其能奮靈德合風雲超忽荒而蹏昊蒼也故夫泥
蟠而天飛者應龍之神也先賤而後貴者和隋之珍也
時暗而久章者君子之真也若乃牙曠清耳於管絃離
婁眇目於毫分逢蒙絕技於弧矢般輸摧巧於斧斤良
樂軼能於相馭烏獲抗力於千鈞和鵠發精於鍼石妍
桑心計於無垠走亦不任廁技於彼列故密爾自娛於

斯文

難巖周

太古之世不車不舟陸足以游不棟不守巢穴而處

頌

竇車騎北征頌

車騎將軍應昭明之上德該文武之妙姿蹈佐歷握輔
襟翼肱聖上作主光輝資天心謨神明規卓遠圖幽冥
親率戎士巡撫疆城勒邊御之永設奮輶櫓之遠徑閔

遐黎之騷狄念荒服之不庭乃總三選簡虎校勦部隊
明誓號援謀夫於末言察武毅於俎豆取可杖於品象
拔所用於仄陋料資器使采用先務民儀響慕羣英影
附羌戎相率東胡爭鶩不召而集未令而諭於是雷震
九原電曜高闕金光鏡野武旗督斡衝雞鹿超黃磧輕
選四縱所從莫敵馳飈疾踵蹊迹探梗莽採解阨斷溫
禹分戶逐電激私渠星流霰落名王交手稽額請服乃
收其鋒鏃干齒甲胄積象如丘阜陳閱滿廣野戢載連

百兩散數累萬億放獲驅拏揣城拔邑擒馘之倡九谷
謚誅響括東夷埃及域然而唱呼鬱憤未逞厥願甘
平原之酣戰矜訊捷之累筭何則上將崇至仁行凱易
弘濃恩降溫澤同庖廚之珍饌分裂室之纖帛勞不御
輿寒不施禪行無偏勤止無兼役性蒙識而復戾順二
者異而懦夫奮遂踰涿郡跨祈連籍庭蹠就疆猶靖嶃
轔幽山趨凶河臨安侯軼焉居與虞衍顧衛霍之遺迹
賊伊秩之所邈師橫鷺而庶御士拂渭以爭先回萬里

而風騰劉殘寇於沂垠糧不賦而師瞻役不重而備軍
行戎醜以禮教忻鴻校而昭仁文武炳其竝隆威德兼
而兩信清乾鈞之攸冒拓畿畧之所順橐弓鏃而戢戈
回雙麾以東運於是封燕然以隆高禮廣鞬以弘曠銘
靈陶以勒崇欽皇祇之祐貺宣惠氣盪殘風軻泰幽嘉
凝陰飛雪瀼庶其雨洒淋榛枯一握興嘉卉始濃土膏
含養四行分仕於是三軍稱曰亹亹將軍克廣德心光
光神武弘昭德音超穹眇天潛眇兮與神參

東巡頌

竊見巡狩岱宗柴望山虞崇祀明堂上稽帝堯中述世
宗遵奉世祖禮儀備具動自聖心是以明神屢應休徵
乃降不勝狂簡之情謹上岱宗頌一篇

曰若稽古在漢迪哲聿修厥德憲章丕烈翻六龍較五
輶齊百僚陶質素命南重以司厯厥中月之六辰備天
官之列衛盛輿服而東巡

南巡頌

惟漢再受命系葉十一協景和則天經郊高宗光六幽
通神明既禘祖於西都又將祫于南庭是時聖上運天
官之法駕建日月之旆旌

銘

封燕然山銘

有序

惟永元元年秋七月有漢元舅曰車騎將軍竇憲竇亮
聖皇登翼王室納于大麓惟清緝熙乃與執金吾耿秉
述職巡禦治兵於朔方鷹揚之校螭虎之士爰該六師

暨南單于東胡烏桓西戎氐羌侯王君長之羣驍騎十
萬元戎輕武長轂四分雷轔蔽路萬有三千餘乘勒以
八陣蒞以威神玄甲輝日朱旗絳天遂凌高闕下雞鹿
經磧鹵絕大漠斬溫禺以釁鼓血尸逐以染鍔然後四
校橫徂星流彗掃蕭條萬里野無遺寇於是域滅區殫
反旆而旋考傳驗圖窮覽其山川遂踰涿邪跨安侯乘
燕然躡冒頓之區落焚老上之龍庭將上以據高文之
宿憤光祖宗之玄靈下以安固後嗣恢拓境宇振大漢

之天聲茲可謂一勞而久逸暫費而永寧也乃遂封山

刊石昭銘盛德其辭曰

鏢王師兮征荒裔勦凶虐兮截海外

右叶
志韻

隻其邈兮亘

地界

叶居
吏反

封神丘兮建隆碣

其例
與碣同

熙帝載兮振萬世

高祖沛水亭碑銘

皇皇聖漢兆自沛豐乾降著符精感赤龍承旣流裔襲唐末風寸天尺土無埃斯亭建號宣基維以沛公揚威斬蛇金精摧傷涉闕陵郊係獲秦王應門造勢斗璧納

忠天期乘祚受爵漢中勒陳東征剝擒三秦靈威神佑
鴻溝是乘漢軍改歌楚衆易心誅項討羽諸夏以康陳
張畫策蕭勃翼終出爵褒賢裂土封功炎火之德彌光
以明源清流潔本盛末榮叙將十八贊述股肱休勛顯
祚永永無疆國寧家安我君是升根生葉茂舊邑是仍
於皇舊亭苗嗣是承天之福祐萬年是興

十八侯銘

鄼侯蕭何

耽耽相國弘策不追御國維綱秉統樞機文昌四友漢
有蕭何序功第一受封于鄼

將軍舞陽侯樊噲

巍巍將軍威蓋不當操盾千鈞拔主項堂興漢破楚矯
矯忠良卒為丞相帝室以康

將軍留侯張良

赫赫將軍受兵黃石規圖勝負不出帷幄令惠瞻仰安
全正朔國師是封光榮舊宅

太尉絳侯周勃

懿懿太尉惇厚朴誠輔翼受命應節御營歷位卿相王國兼并見危致命社稷以寧

將軍平陽侯曹參

蹇蹇相國允忠克誠臨危處險安而匡傾興代之際濟主立名身履國土秉御乾楨

丞相戶牖侯陳平

洋洋丞相勢謫師旅擾攘楚魏為漢謀主六奇解厄揚

名於後

南宮侯張教

堂堂張教耳之遺萌以誠佐國序跡建忠功成德立寵
封南宮垂號萬春永保無疆

衛尉曲陽侯酈商

衍衍衛尉德行循規遭兄食其隕沒於齊橫恥愧景刎
頸自獻金紫褒表萬世不刊

將軍潁陽侯灌嬰

煌煌將軍輔漢久長威震呂氏姦惡不揚寇攘殄盡躬
迎代王功顯帝室萬世益章

將軍汝陰侯夏嬰

斌斌將軍鷹武是揚內康王室外鎮四方諸夏乂安流
及要荒聲騁海內苗嗣紀功

將軍陽陵侯傅寬

休休將軍如虎如羆御師勒陳破敵以威靈金曜楚火
流鳥飛將命仗節功績永垂

將軍信武侯靳歙

斤斤將軍忠信孔雅出身六師十二匹旅折衝扞難遂寧天下金龜章德建號傳後

丞相安國侯王陵

明明丞相天賦挺直剛德正行不枉不曲功業成著榮顯食邑距呂奉主昭然不惑

將軍襄平侯韓信

桓桓將軍輔主克征奉使全璧身出項營序功差德履

讓以平轉北而遊雲中以傾

將軍棘津侯陳武

巖巖將軍帶武佩威御雄乘險難困不違仇滅主定四
海是賴功成食土德被遐邇

曲成侯蠱達

晏晏曲成輿從龍騰安危從主赤曜以升赫赫皇皇道
彌光明惟德御國流及後萌

御史大夫汾陽侯周昌

肅肅御史以武以文相趙距呂志安君身徵詣行所如意不全天秩邑上助乃永存

將軍青陽侯王吸

邑邑將軍育養燕徒建謀正直行不匿邪入軍討敵頂定天都佩雀雙印百里為家

論

難莊論

衆人之逐世利如青蠅之赴肉汁也青蠅嗜肉汁而忘

溺死衆人貪世利而陷罪禍

功德論

朱軒之使鳳舉於龍堆之表

哀辭

馬仲都哀辭

并序

北堂書鈔載班固馬仲都哀辭按此不似固自序似人為序其事也

車騎將軍順文侯馬仲都明帝舅也從車駕於水浮橋
馬驚入水溺死帝顧謂侍御史班固於馬上三十步遂

為哀辭

連珠

擬連珠五首

臣聞公輸愛其斧故能妙其功明主貴其士故能成其治

臣聞良匠度其材而成大夏明主器其士而建功業
臣聞聽決價而資玉者無楚和之名因近習而取士者
無伯王之功故璵璠之為寶非駟儈之術伊呂之為佐

非左右之舊

臣聞鸞鳳養六翮以凌雲帝王乘英雄以濟民易曰鴻漸于陸其羽可用為儀

臣聞馬伏阜而不用則駑與良而為羣士齊察而不職則賢與愚而不分

文

奕旨

大冠言博既終或進而問之曰孔子稱有博奕今博行

於世而奕獨絕博義既弘奕義不述問之論家師不能
說其聲可聞乎曰學不廣博無以應客北方之人謂綦
為奕弘而說之舉其大畧厥義深矣局必方正象地則
也道必正直神明德也綦有白黑陰陽分也駢羅列布
效天文也四象既陳行之在人蓋王政也成敗臧否為
仁由己危之正也夫博懸於投不專在行優者有不遇
劣者有僥倖踦拏相凌氣勢力爭雖有雄雌未足以為
平也至於奕則不然高下相推人有等級若孔氏之門

回賜相服循名責實謀以計策若唐虞之朝考功黜陟
器用有常施設無祈因敵為資應時屈伸續之不復變
化日新或虛設豫置以自護衛蓋象庖羲罔罟之制限
防周起障塞漏決有似夏后治水之勢一孔有闕壞額
不振有似瓠子汎濫之敗一暴破塞亡地復還曹子之
威作伏設詐突圍橫行田單之奇要厄相刦割地取償
蘇張之姿固本自廣敵人恐懼三分有二釋而不誅周
文之德知者之慮也既有過失能量弱強逡巡需行保

角依旁却自補續雖敗不亡繆公之智中庸之方也上有天地之象次有帝王之治中有五霸之權下有戰國之事覽其得失古今畧備及其晏也至於發憤忘食樂以忘憂推而高之仲尼概也樂而不淫哀而不傷質之詩書關雎類也純專知柔陰陽代至施之養性彭祖氣也外若無為默而識淨泊自守以道意隱居放言遠咎悔行象虞仲信可喜感乎大寇論未備故因問者喻其事

詩

郊祀靈芝歌

因露寢兮產靈芝象三德兮瑞應圖延壽命兮光此都
配上帝兮象太微參日月兮揚光輝

詠史

三王德彌薄唯後用肉刑太倉令有罪就逮長安城自
恨身無子困急獨筦筦小女痛父言死者不可生上書
詣闕下思古歌雞鳴憂心摧折裂晨風揚激聲聖漢孝

文帝惻然感至情百男何憒憒不如一緹榮

竹扇詩

供時有度量異好有團方來風堪避暑靜夜致清涼



漢魏六朝百三家集卷十一



總校官庶吉士臣侍朝
校對官編修臣方煒
謄錄監生臣倪時慶

欽定四庫全書叢要

集部

漢魏六朝百三家集卷十三



詳校官候選知縣臣吳甸華

欽定四庫全書會要卷一萬九千六百一集部

漢魏六朝百三家集卷十二

明 張溥 輯

崔駰集



賦

反都賦

有序

漢歷中絕京師為墟光武受命始遷洛都客有陳西土之富云洛邑褊小故略陳既敗之機不在險也

建武龍興奮旅西驅虜赤眉討高明斬銅馬破骨都收
翡翠之駕據天下之圖上帝受命將昭其烈潛龍初九
真人乃發上貫紫宮乘徊天闕掘狼狐臨參伐陶以乾
坤始分日月觀三代之餘烈察殷湯之遺風背靖函之
固即周維之中興四郊建三雍禪梁父封岱宗

大將軍西征賦

有序

主簿駟言愚聞昔在上世義兵所克工歌其詩賢陳其
頌書之庸器列在明堂所以顯武功也

於是襲孟秋而西征跨雍梁而遠蹤陟龍阻之峻坂升
天梯以高翔旗旄翼如遊風羽毛紛其覆雲金光皓以
奪日武鼓鏗而雷震

大將軍臨洛觀賦

濱曲洛而立觀營高壤而作廬處崇顯以間敞超絕鄰
而特居列阿閣以環匝表高臺而起樓步輦道以周流
臨軒楹以觀魚於是迎夏之首末春之垂桃枝夭夭楊
柳猗猗既乃日垂鹵陽中曜內光弛銜縱策逸如奔鶴

著述

達旨

或說已曰易稱備物致用可觀而有所合故能扶陽以出順陰而入春發其華秋收其實有始有極爰登其質今子韞續六經服膺道術歷世而游高談有日俯鉤深於重淵仰探遠乎九乾窮至赜於幽微測潛隱之無源然下不步卿相之廷上不登王公之門進不黨以讚已退不贐於庸人獨師友道德合符曩真抱景特立與士

不羣蓋高樹靡陰獨木不林隨時之宜道貴從凡於時
太上運天德以君世憲王僚而布官臨雍泮以恢儒疏
軒冕以崇賢率惇德以厲忠孝揚茂化以砥仁義選利
器於良材求鎔鋤於明智不以此時攀台階闢紫闈據
高軒望朱闕夫欲千里而咫尺未發蒙竊惑焉故英人
乘斯時也猶逸禽之赴深林蟲蚋之趣大沛胡為嘿嘿
而久沉滯也答曰有是言乎子苟欲勉我以世路不知
其跌而失吾之度也古者陰陽始分天地初制皇綱亡

緒帝紀乃設傳序歷數三代興滅皆大庭尚矣赫胥固識淳樸散離人物錯雜高辛攸降厥趣各違道無常稽與時張弛失仁為非得義為是君子通變各審所履故士或掩目而淵潛或盥耳而山棲或草耕而僅飽或木茹而長饑或重聘而不來或屢黜而不去或冒詢以干進或望色而斯舉或以役夫發夢於王公或以漁父見兆於元龜若夫紛縷塞路凶虐播流人有昏墊之戾主有疇咨之憂條垂藟蔓上下相求於是乎賢人授手援

世之災跋涉赴俗急斯時也背堯含厯而臯陶謨高祖
歎而子房慮禍不散而曹絳奮結不解而陳平權及其
策合道從克亂弭衝乃將鏤立珪冊顯功銘昆吾之治
勒景襄之鍾與其有事則褰裳濡足冠挂不顧人溺不
拯則非仁也當其無事則躡纓整襟規矩其步德讓不
修則非忠也是以險則救俗平則守禮舉以公心不私
其體今聖上之育斯人也樸以皇質雕以唐文六合怡
怡比屋為仁壹天下之衆異齊品類之萬殊參差同量

环治一陶羣生得理庶績其凝家家有以樂和人人有
以自優威械藏而俎豆布六典陳而九刑厝濟茲兆庶
出於平易之路雖有力牧之略尚父之厲伊臯不論奚
事范蔡夫廣廈成而茂木暢遠求存而良馬繫陰事終
而水宿藏場功畢而大火入方斯之際處士山積學者
川流衣裳被宇冠蓋雲浮璧猶衡陽之林岱陰之麓伐
尋抱不為之稀執拱把不為之數悠悠罔極亦各有得
彼採其華我收其實舍之則藏已所學也故進動以道

則不辭執珪而秉柱國復靜以理則甘糟糠而安藜藿
夫君子非不欲仕也恥夸毗以求舉非不欲室也惡登
牆而摟處呌呼衍鬻縣旌自表非隨和之寶也暴智耀
世因以干祿非仲尼之道也游不倫黨苟以徇己汙血
競時利合而友予笑我之沉滯吾亦病子屑屑而已
也先人有則而我弗虧行有枉徑而我非隨臧否在予
唯世所議固將因天質之自然誦上哲之高訓詠太平
之清風行天下之至順懼吾躬之穢德勤百畝之不耘

繫余馬以安行俟性命之所存昔孔子起威於夾谷晏
嬰發勇於崔杼曹刷舉節於柯盟十嚴克捷於彊禦范
蠡錯執於會稽伍員樹功於柏舉魯連辯言以退燕色
胥單辭而存楚唐且華顛以悟秦甘羅童牙而報趙原
襄見廉於壺飧宣孟收德於東脯吳札結信於丘木展
季効貞於門女顏回明仁於度轂程嬰顯義於趙武僕
誠不能編德於數者竊慕古人之所序

華嶠書曰駟譏揚雄以為范蔡鄒衍之徒乘釁相傾
誑曜諸侯者也而云彼我異時又曰竊貲卓氏割炙

細君斯皆士之贊行而云不能與
此數公者同以為失類而改之也

書

與竇憲書

駟聞交淺而言深者愚也在賤而望貴者惑也未信而納忠者謗也皆所不宜而為蹈之者思効其區區情盈而不能已也竊見足下體純淑之姿躬高明之量意美志厲有上賢之風駟幸得充下館序後陳是以竭其拳拳敢進一言傳曰生而富者驕生而貴者傲生富貴而

能不驕傲者未之有也今寵祿初隆百僚觀行當克舜
之盛世處光華之顯時豈可不庶幾夙夜以永衆譽弘
申伯之美致周邵之事乎語曰不患無位患所以立昔
馮野王以外戚居位稱為賢臣近陰衛尉克已復禮終
受多福鄭氏之宗非不尊也陽侯之族非不盛也重侯
累將建天樞執斗柄其所以獲譏於時垂愆於後者何
也蓋在滿而不挹位有餘而仁不足也漢興以後迄於
哀平外家二十保族全身四人而已書曰鑒于有殷可

不慎哉竇氏之興肇自孝文二君淳淑守道成名先日
安豐以佐命著德顯自中興內以忠誠自固外以法度
自守卒享祚國垂祉於今夫謙德之光周易所美滿溢
之位道家所戒故君子福大而愈懼位隆而益恭遠察
近覽俯仰有則銘諸几杖刻諸盤杼矜矜業業無殆無
荒如此則百福是荷慶流無窮矣

牋

與竇憲牋

主簿崔駰言今旦漢陽太守稜吏卒數十人皆脅鷹牽
狗陳於道側云欲上幕府駰聞傳曰禽獸之皮不足以
備器用其肉不可以將獻養則公不舉焉禮公侯非麋
兕射且以服猛為民除害因以登臨器械也故晉唐叔
射兕於徒林以為大甲夫鷹犬所獲不過雉兔而有歷
險阻之難斯乃細人匹夫之事非王侯大人所為要資
也駰幸得充下館序在衆賢後乘是以竭其惓惓敢進

一言

北堂書鈔載牋云主簿職在拾遺夙夜致思智慮淺短何益也選注載奏記云珥筆特牘拜謁曹

下

與竇憲牋

南單于請兵北伐拜憲車騎將軍金印紫綬官屬休司空

君侯以野幕為府前世封青故事也

與竇憲牋

將軍窮絕天阻萬里長途

箴

太尉諸箴

天官冢宰庶僚之率師錫有帝命虞作尉爰叶台極妥

平國域制軍詰禁王旅惟式九州用綏羣公咸治干戈
載戢宿纏其紀上之云據下之云戴苟非其人歎我帝
載昔周人思文公而召南詠甘棠昆吾隆夏伊摯盛商
季世頗僻禮用不往無曰我強莫余敢喪無曰我大輕
戰好殺紂師百萬卒以不艾宰臣司馬敢告在際

司徒箴

天監在下仁德是興乃立司徒亂茲黎烝莊莊庶域率
土祁祁民具爾瞻四方是維乾乾夕惕靡怠靡違恪恭

爾職以勤王機敬敷五教九德咸事嗇人用章點毗是
富無曰余情忘余爾輔無曰余聖以忽執政匪用其良
乃荒厥命庶績不怡疚于爾祿豐其折右而鼎覆其餗
書歌股肱詩刺南山尹氏不堪國度斯憊徒臣司衆敢
告執藩

大理箴

邈矣臯陶翊唐作士設為犴狴九刑允理如石之平如
淵之清三槐九棘以質以聽罪人斯殛凶旅斯并熙乂

帝載旁施作明昔在仲尼哀矜聖人子罕禮刑衛人釋
難釋之其忠勲亮孝文于公哀寡定國廣門貞哉邈矣
舊訓不遵主慢臣驕虐用其民賞以崇欲刑以肆忿紂
作炮烙周人滅殷夏用淫刑湯誓其軍衛鞅酷烈卒殞
于秦不疑加害禍不反身嗟茲大理慎于爾官賞不可
不思斷不可不虔或有忠能被害或有孝而見殘吳況
伍胥殷割比干莫遂爾情是截是刑無遂爾心以速以
殛天鑒在顏無細不錄福善災惡其微甚速理臣思律

敢告執獄

虎賁中郎箴

赫矣帝臣爰奮厥武桓桓征夫矯矯其旅王師是成戎
事是禦惟鳥之鶠惟霆之發出翼王路入司階闔功成
閼邪憂其萌孽

河南尹箴

御覽作揚雄誤
西漢無河南尹

茫茫天區畫冀為京商邑翼翼四方是營唐虞商周河
洛是居成王郊廟以處鶠墟諸夏勁强是從是橫徹我

牆居而師尹不匡霸奪其權宗器以分圖籍遷齊九鼎

入秦爰作卿士以尹王州風化攸興萬國承流

爰作四
句太平

御覽案入秦下有

闕句一作之經

酒箴

豐侯沉酒荷冕負缶自穀於世圖形戒後

銘

仲山文鼎銘

鼎耳革其行塞雉膏不食方雨虧悔終吉有福足勝其

任公餗乃珍於高思危在滿戒溢可以永年天之大律

車左銘

三銘古文
范作傅毅

虞夏作車取象璣衡君子建左法天之陽正位受綏車
不內顧塵不出軌鸞以節步彼言不疾彼指不躬玄覽
于道永思厥中

夏文苑
作氏

車右銘

擇御卜右採德用良詢納耆老于我是往惟覽是師惟
道是式箴闕旅賁內顧自敕匪皇其度匪愆其則越戒

敦儉禮以華國

儉文苑
作約

車後銘

敬其在路體貌思恭望衡顧轂允慎茲容無或好失匪盤于遊顧省厥遺虎尾斯求昭德塞違抑盈以無雖有三晉歛然若虛失音

樽銘

惟歲之元朝賀奉樽金罍犧象嘉禮具存獻酬交錯萬

國咸歡

國古字

襪銘

機衡建子萬物含滋黃鍾育化以養元基長履景福至
于億年皇靈既祐祉祿來臻本枝萬世子子孫孫

縫銘

惟歲之始承天嘉德皇靈

闕

闕

願國絲綏克贊以

闕

朝

迪

刀劍銘

歐冶運巧鑄鋒成鍔麟角鳳體玉飾金錯

又

龍淵大阿干將莫邪帶以自禦燼燼吐花

刻漏銘

天德順動人以立信乃作斯策以咸渥潤封傳今覽爰暨四極

六安枕銘

言六面皆安也

枕有規矩恭一其德承元寧躬終始不忒

扇銘

有圓者扇誕此秀儀晞露散靈擬日定規朗姿玉暢惠
風時披

頌

上四巡頌表

臣聞陽氣發而鷁鷀鳴秋風厲而蟋蟀吟氣之動也唐
虞之世樵夫牧豎擊轍中韶感于和也臣不知手足之
動音聲敢獻頌云

西巡頌

有序

惟永平三年八月己丑行幸河東志曰君舉必書是故工歌其詩史立春秋若夫聲管不發雅頌罔記

惟秋穀既登上將省歛平秩西成巡畿于西郊因斯萬物凝德緩俗昔既春遊今乃秋稼

南巡頌

有序

建初九年秋穀始登猶斯嘉時舉先王之大禮假于章陵遂南巡楚路臨江川以望衡山顧九疑嘆虞舜之風是時庶績咸熙固可默陟

惟休蒸之鴻德允天覆而無遺壯雲行之博惠淑雨施
於庶黎

東巡頌

元和二年章帝東巡狩一作傳毅

伊漢中興三葉於皇惟烈允迪厥倫矩坤度以範物規
乾則以陶鈞於是考上帝以質中總列宿於北辰開太
微敞禁庭延儒林以諮詢岱嶽之事于時典司者考載
華抱實迺爾而造曰盛哉大漢既重雍而襲熙世增其
德唯斯嶽禮久而不脩此神人之所慶幸海內之所想

思頌有喬山之征典有徂嶽之巡時邁其邦民斯攸勤
不亦宜哉乃命太僕訓六駟閑路馬戒師徒於是乘輿
登天靈之威路駕太一之象車升九龍之華旗建掃寬
之旌旄哀胡耇之元老賞孝行之畯農闕三軍霆激羽
騎火烈天動雷霆隱隱鱗鱗登天靈之威輶駕太乙之

象車躬東作之上務始八正於南行

古文苑厥倫下有續王命脩漢興句

民作人訓作
馴驕作轡

北巡頌

有序

元和三年正月上既畢郊祀之事乃東巡出于河內納
青充之郊回冀州禮北嶽聖澤流浹黎元被德嘉瑞竝
集乃作頌曰

禋潔享祈歆嘗百神爰始賦政授務于人雍容清廟謐
爾無虞垂拱穆穆神行化馳

登中山闕天帝觀神農將省陽穀相天功巡東作

漢明帝頌

帝乃負戾執胄覆珪運斗杓以酬酢酌酒旗之玉卮

北征頌

人事協兮皇恩得金精揚兮水靈伏順天機兮犯刑德
戈所指兮罔不克

杖頌

爰植根於湘浦承雷夏之洪澤寓浮雲而貽我合天生
之質直用以為杖飾以犀角王母扶持永保百祿壽如
南極子孫千億

議

章帝謚議

臣聞號者功之表謚者行之迹據德錄功各當其實孝經曰天地明察神明章矣

論

博徒論

博徒見農夫戴笠持耨以芸蓼荼面色驪黑手足胼胝膚如桑朴足如熊蹄蒲望壠畝汗出調泥乃謂曰子觸熱耕耘背上生鹽脰如燒椽皮如領革錐不能穿行步

狼跋蹄戾脰酸謂子草木支體屈伸謂子禽獸形容似人何受命之薄稟性不純

又

牛臚羊膾炙鴈煮鳧鷄寒狗熟重案滿盈

適逢長吏撫綏于車蒸羔魚鱉鯪鵠煎魚但到酒爐不

醉無歸

七

七依

客曰乃導玄山之梁不周之稻龍以繕絡砥以柔韋洞
庭之鮒灌水之鯀滋以陽樸之薑菽以壽木之華鹺以
大夏之壠酢以越裳之梅反宇垂阿洞門金鋪丹柱雕
楹飛閣層樓於是置酒乎讌遊之堂張樂乎長娛之臺
酒酣樂中美人進以承宴調歡欣以解容迴顧百萬一
笑千金振飛縠以長舞袖鳬絀腰以務抑揚當此之時
孔子傾於阿谷柳下忽而更婚老聃遺其虛靜揚雄失
其太玄此天下之逸豫宴樂之至盤也公子豈能興乎

客曰彭蠡之鳥萬萬而羣荆山之獸億億而屯雲合風
散隱隱震震乃命長狄使驅獸夷羿作虞人騰句喙以
追飛騁韓盧以逐奔弓彈交錯把弧控弦彎繁弱鼓千
鈞死獸籍籍聚如山陵選取上鮮獻之庖人

雜文

婚禮結言

乾坤其德恒久不已爰定天網夫婦作始乃降英媛有
淑其儀姬姜是侔比則姚媯載納嘉贊申結馨禩

詩

安封侯詩

戎馬鳴兮金鼓震壯士激兮忘身命被光甲兮跨良馬

揮長戟兮彀強弩

彀藝文作廓

七言詩

鸞鳥高翔時來儀應治歸德合望規啄食竹實飲華池

漢魏六朝百三家集卷十二